

CUNSIZOS CUN ESEMPIO

Si cheres educadu fizu t'eu  
 (e lu debes.... pro ca s'è obbrigadu!)  
 tue, pro primu, debes dare prou  
 cun iss'e totu, chi s'è educadu,  
 ca si nadu no l'est in sensu sou  
 no basta' narrerbilu ch'es' peccadu,  
 ca issu plus mira' che intèndhede.  
 Si li naras "no fures", mentres furas,  
 "no frastimes", però tue frastimes,  
 "no trascures", però tue trascuras,  
 "no òdies", ma tue no istimes,  
 "nè falzu giures", e tue lu giuras,  
 inùtil'es' ch'a boghe bi l'imprimas,  
 ca ndhe 'ide' s'esempiu e comprendhede  
 chi, si lu faghes tue, già mazore,  
 lu pode' fagher issu... ch'es' minore!

EH, S'HAPERA CHE BOIS VOLUNTADE....

Es' già istiu, tempus de calura,  
 de triulas sos pramos soliones;  
 es' già sicca trajada sa pastura,  
 sun in sos meriagos sos masones;  
 su massagiu, cun tanta premura,  
 impignadu in sas brundhas 'idatones,  
 regogliendhe su fruttu sueradu.  
 Ed eo, a pass'istraccu, in su fenalzu,  
 mentres so a s'umbraghe requendhe,  
 m'agatt'e fronte a unu frommijalzu,  
 ue m'incanto, reu, e, osservendhe  
 sas sémidas, sa tana, su pazalzu,  
 sas frommijas intentas trabagliendhe,  
 iscremo, imbelosidu, smacchiadu:  
 "Eh, s'hapera che bois voluntade....  
 no dia viver in calamidade!".

S' O R F A N U

Chie si pèsad orfanu pianghede  
 ca connotu no ha' su primu amore;  
 s'alenu su succuttu bi lu franghede;  
 in cara si li legge' su dolore;  
 e plus pens a su coro l'annanghede  
 candho 'ide' s'anzenu zenitore  
 chi su fizu carigna' càn affettu!  
 Pro su plus es' tristu e penserosu,  
 e birgonzosu e tìmidu cun totu;  
 plus manna'es', plus es' desizosu  
 de cuddh'amore chi no ha' connotu;  
 si l'immàzina' bellu, affettuosu  
 e tantu caru, chens l'esser notu;  
 solu su nomen l'es' che sacru oggett!  
 e ndhe li 'eni' sa mazor'edade  
 suspirendhe sa sua orfanidade.

(Alvareddu)